

四庫全書

子部

欽定四庫全書

藝文類聚卷六十

唐 歐陽詢 撰

軍器部

牙

彈 稍

刀

匕首

鉞

弓

箭

弩

牙

兵書曰牙旗者將軍之精凡始豎牙必以剛日剛日者謂之上尅下也立牙之日吉氣來應大勝之徵

黃帝出軍訣曰始立牙之日旗幡指敵或從風而舉暉暉終日不絕繞竿勇氣奔逸人曰將軍出兵有所討伐

引兵出城門望見白雲及白水者舉白牙旗五色牙旗
隨天氣四時

魏志曰典韋初為張邈士屬趙寵牙門旗長大莫能勝
韋一手建之寵異其才力

吳志曰陸遜為右都督會丹陽賊帥費棧扇動山越權
遣遜討棧棧支黨多所往兵少遜乃益施牙幢分付鼓
角夜潛出谷間鼓譟而前應即破散

抱朴子曰軍所始舉牙立旗風氣和調幡校飄飄終日

不息者其軍有功也

賦吳胡綜大牙賦曰黃武八年黃龍見夏口孫權稱號
因瑞改元作黃龍大牙常在軍中進退視其所向命綜
為賦曰狼狐垂象實惟兵精聖人觀法是效是營始作
器械爰求厥成明明大吳實天生德乃律天時制其神
軍取象太一五將三門疾則如電遲則如雲進止有度
約而不煩四靈既布黃龍處中周制日月實曰太常傑
然特立六軍四望

祭文後漢滕輔祭牙文曰恭脩太牢絜薦遐靈推轂之
任實討不庭天道助順正直聰明

晉袁宏祭牙文曰天生五材治道所司廢一不可靜亂
輔時

晉顧愷之祭牙文曰維某年某月日錄尚書事豫章公
裕敢告黃帝蚩尤五兵之靈兩儀有政四海有王奉命
在天世德重光烈烈高牙闐闐伐鼓白氣經天簡揚神
武

宋王誕伐廣固祭牙文曰敬建崇牙顯茲威靈使鳴金輟釁無戰有寧皇風幽被凱旆歸旌

宋鄭鮮之祭牙文曰絜牲先事薦茲敬祭崇牙既建義鋒增厲人鬼一揆三才同契惟茲靈鑒庶必有察逆順幽辨忠孝顯節使凶醜時殲主寧臣悅振旅上京凱歸西蕃神器增輝四境永安

劍

釋名曰劍檢也所以防檢非常也

集韻曰鐔劍口也

字林曰瑑劍鼻也

龍魚河圖曰流州在西海中上多積石名為昆吾石冶其石成鐵作劍光明四照洞如水精又曰劍名飛揚

管子曰崑天廬之山發而出金蚩尤受而制之以為劍
鎧矛戟

山海經注曰汲冢中得銅劍一枚長三尺五寸今所名干將劍明古者通以錫銅為兵器又曰君子之國其

人衣冠帶劍

周官曰鄭之刀宋之斤魯之削吳越之劍遷乎其地而不能為良地氣然也

管子曰羽劍珠飾者斬生之斧也

吳越春秋曰越王允常聘歐冶子作名劍五枚一曰純鉤二曰湛盧三曰豪曹或曰盤郢四曰魚腸五曰巨闕秦客薛燭善相劍王取純鉤示之薛燭矍然望之曰沉沉如芙蓉始生於湖觀其文如列星之行觀其光如水

之溢塘觀其文色煥煥如冰將釋見日之光王曰客有
賣此劍者有市之鄉三十駿馬千足千戶之都二其可
與乎薛燭曰不可臣聞王之造此劍赤堇之山破而出
錫若耶之谿涸而出銅吉日良時雨師灑道雷公發鼓
蛟龍捧壚天帝壯炭太一下觀於是歐冶子因天地之
精造為此劍取湛盧視之薛燭曰善哉銜金鐵之英行
氣託靈服此劍者可以折衝伐敵人君有逆謀則去之
允常以魚腸湛盧豪曹獻吳王僚後闔閭為一女殺生

以送死湛盧之劍惡其無道乃去如楚昭王寐而得之
召風胡子問之此劍值幾何對曰赤堇之山已合若耶
之谿深而不測羣神上天歐冶子已死雖有傾城量金
珠玉猶不可與况駿馬萬戶之都乎

越絕書曰楚王召風胡子而問之曰寡人聞吳有干將
越有歐冶子寡人願請此二人作鐵劍乃令風胡子之
吳見歐冶子干將使之作為鐵劍曰泰阿晉鄭聞而求
之不得興師圍楚於是王引泰阿之劍登城而麾之三

金史卷之六十一
卷六十一
軍破敗士卒迷惑十里流血猛獸歐膽江水折揚晉
鄭之頭畢白

列子曰衛孔周其祖得殷帝之寶劍童子服之却三軍
之衆其一曰含光視之不可見運之不知其所觸泯然
無際經物而物不覺二曰承影將旦昧爽之交日夕昏
明之際北面察之淡焉若有物在莫識其狀其觸物也
寂無有聲而物不疾三曰宵練方晝見其影不見光驢
駑然而過隨合覺疾而不血刃此三寶傳之十三世矣

又曰宋王有蘭子者以技干宋元君弄七劍迭躍之五劍常在空中元君大驚立賜金帛又曰周穆王征西戎西戎獻昆吾之劍赤刃切玉如泥

莊子曰昔趙文王喜劍莊子曰臣聞大王喜劍臣有三劍惟王所用有天子劍有諸侯劍有庶人劍天子之劍以燕谿石城為鋒齊代為鏑晉衛為脊周宋為鐔韓魏為鉞統以渤海帶以常山此劍一用匡諸侯天下服矣諸侯之劍以智勇士為鋒以精廉士為鏑以賢良士為

脊以忠聖士為鏌以豪傑為鋏此劍一用如雷霆之震也庶人之劍蓬頭突鬚垂冠曼胡之纓短後之衣瞑目而語難相擊於前此無異鬪雞一旦命以絕矣今大王有天子之位而好庶人之劍臣竊為大王薄之

荀卿子曰桓公之慈太公之闕文王之琢莊君之忽闔閭子干將莫耶巨闕辟閭皆古良劍也

尸子曰水試斷鵠鴈陸試斷牛馬所以觀良劍也

呂氏春秋曰楚人有涉江者其劍自舟中墜於水遂刻

其舟曰是吾劍之所從墜也舟止從其所契刻者入水求之舟已行矣而劍不行求劍若此不亦惑乎又曰荆有飲飛者得寶劍於江干遂還反涉江至於中流而兩蛟夾繞其船飲飛攘臂祛衣拔寶劍赴江刺蛟殺之荆王聞之任以執圭

史記曰吳季札之初使北過徐徐君好季札劍口不敢言季札知之為使上國未獻還至徐徐君已死乃解其寶劍繫徐君塚樹而去又曰秦昭王臨朝歎息應侯進

曰臣聞主憂臣辱主辱臣死今大王中朝而憂臣敢請其罪王曰吾聞楚之鐵劍利而倡優拙夫鐵劍利則士勇倡優拙則思慮遠矣以遠思慮而御勇士恐楚之圖秦又曰高祖送徒驪山到豐而夜徑澤中令一人行前行前者還報曰前有大蛇當徑願還高祖曰壯士行何畏乃前拔劍斬蛇又曰高祖擊英布時為流矢所中高祖問醫曰病可治於是高祖慢罵之曰吾從布衣提三尺劍取天下此非天命乎命乃在天雖扁鵲何益又曰

陳平間行仗劍亡渡河船人見其美丈夫獨行疑其亡
將腰中有金寶因之欲殺平平恐解衣佐刺船船人知
其無乃止

說苑曰經侯往過魏太子左帶玉具劍右帶環佩左光
照右石光照左

異苑曰晉惠帝元康三年武庫火燒孔子履高祖斬白
蛇之劍咸見此劍穿屋飛去莫知所向

漢書曰雋不疑字曼倩帝使暴勝之為直指使者素聞

不疑賢遣吏請與相見不疑冠進賢冠帶襦具劍

襦落壯

大又曰陸賈常乘安車駟馬從歌鼓琴瑟侍者十人寶

劍值百金其遊漢庭名聲藉甚

言狼藉其盛

漢武內傳曰西王母帶分景之劍上元夫人帶流黃擇精之劍

東觀漢記曰世祖時有獻名馬寶劍值百金馬以駕鼓車劍以賜騎士

吳越春秋曰伍子胥過江解其劍與漁父曰此劍中有

七星北斗其值百金

典論曰建安二十四年二月壬午魏太子丕造百辟寶劍長四尺二寸淬以清漳厲以礪諸飾以文玉表以通華光似流星名曰飛景

雷次宗豫章記曰吳末亡恒有紫氣見斗牛之間張華聞雷孔章妙達緯象乃要宿問天文孔章曰惟牛斗之間有異氣是寶物之精在豫章曲丘城張華遂以孔章為豐城令至縣掘深二丈得玉匣長八尺開之得二劍其

夕斗牛氣不復見孔章乃留其一匣而進之劍至光耀
煒燁煥若電發後張華遇害此劍飛入襄城水中孔章
臨亡戒其子恒以劍自隨後其子為建安從事經淺瀨
劍忽於腰間躍出遂視見二龍相隨焉

文士傳曰魏文帝愛楊脩才脩誅後追憶脩脩曾以寶
劍與文帝文帝後佩之告左右曰此楊脩劍也

沈約宋書曰世祖賜謝莊以與豫州刺史魯爽別後爽
反叛世祖因宴集問劍所在荅曰昔以與魯爽別竊為

陛下杜郵之賜上甚悅當時以為知言

詩宋鮑照詩曰雙劍將別離先在匣中鳴雌沉吳江裏
雄飛入楚城吳江深無底楚闕有崇局一為天地別豈
直限幽明神物終不隔千祀儻還并

梁吳筠詠寶劍詩曰我有一寶劍出自昆吾谿照人如
照水切玉如切泥鐔邊霜凜凜匣上風淒淒寄語張公
子何當來見携

銘後漢士孫瑞劍銘曰天生五材金德惟剛從革庚辛

含景吐商辯物利用勲伐彌彰暨彼良工歐冶干將爰
造寶劍巨闕墨陽上通皓靈獲茲休祥剖山竭川虹蜺
消亡曜威燿武震動遐荒楚以定霸越以取強

晉裴景聲文身劍銘曰器以利顯實以名舉長劍耿介
體文經武陸斷玄牟水截輕羽九功斯象七德是輔

晉張協泰阿劍銘曰泰阿之劍世載其美淬以清波礪
以越砥如玉斯曜若影在水不運自肅率土從軌

啓梁簡文帝謝勅賁方諸劍等啓曰纔發紫函彫奇溢

目始開泥檢麗飾交陳已匹丹霞之暉乍比青雲之制
身文且貴器用惟宜寒暑兼華左右相照

梁沈約為東宮謝勅賜孟嘗君劍啓曰田文重氣徇名
四豪莫及寶劍雄身故能威陵秦楚人高事遠遺物足
奇謹加玩服以深存古之懷

刀

字林曰琫佩刀下飾也天子以玉諸侯以金琕佩刀上
飾也

太公兵法曰刀子之神名曰脫光

禮記曰割刀之用驚刀之貴貴其義也

論語曰子之武城聞弦歌之聲夫子莞爾而笑曰割雞
焉用牛刀

楚辭曰鈇刀進御遙棄秦呵

孔叢子曰秦王得西戎利刀以之割玉如割木焉

漢書曰龔遂為渤海太守民有帶持刀劍者使賣劍買
牛賣刀買犢曰何為帶牛而佩犢

班固與弟超書曰竇侍中遺仲叔楚勝陵錯橫刀玉璫
早削一枚金錯半垂刀一枚

東觀漢記曰馬嚴為陳留太守建初中嚴病遣功曹史
李龔奉章詣闕上召見龔問疾病形狀以黃金十斤葛
縛佩刀書刀革帶付龔賜嚴又曰賜鄧遵金對鮮卑緄
帶一具金錯五十辟把刀墨再屈環橫刀金鏡屈尺八
佩刀各一

魏武帝令曰往歲作百辟刀五枚適成先以一與五官

將其餘四吾諸子中有不好武而好文學將以次與之
典論曰昔者周魯寶赤刀孟勞又曰平造百辟寶刀名
靈寶其二采似丹霞名曰含章其三鏗似崩霜名曰素
質

費禕別傳曰孫權以手中常所執寶刀贈之

蜀志曰初孫權以妹妻先主妹才捷剛猛有諸兄風侍
婢百餘人皆親執刀侍立先主每入心常慄慄

物理論曰古有阮師之刀天下之所寶貴也初阮之作

刀受法於金精之靈七月庚辛見金神於治監之門其人光色燦耀向而再拜神執其手曰子可教也既致之閑宴設饌而問焉神教以水火之齊五精之陶用陰陽之候取剛軟之和

陸機晉書曰王濬之在郡也夢懸四刀於其上甚惡之濬主簿李毅拜賀曰夫三刀為州而見四益一也明府其臨益州乎

聖證論曰昔國家有優曰史利漢氏舊優也云梁冀有

火浣布切玉刀一朝以為誕而不信也正始初得火浣布乃信

晉中興書曰初魏徐州刺史呂虔有佩刀工相之以為必三公可服此刀虔謂別駕王祥曰苟非其人刀或為害卿有公輔之量故以相與

蒲元傳曰君性多奇思於斜谷為諸葛亮鑄刀三千口刀成自言漢水鈍弱不任淬用蜀江爽烈是謂大金之元精天分其野乃命人於成都取江水君以淬刀言雜

涪水不可用取水者捍言不雜君以刀畫水言雜八升
取水者叩頭云於涪津覆水遂以涪水八升益之以竹
筒內鐵珠滿中舉刀斷之應手虛落因曰神力今屈耳
環者乃是其遺範

賦魏陳王曹植寶刀賦曰建安中魏王命有司造寶刀
五枚以龍熊鳥雀為識太子得一余及余弟饒陽侯各
得一焉有皇漢之明后思潛達而玄通飛文藻而博致
揚武備以禦凶然後礪以五方之石鑑以中黃之壤規

圓景以定環攄神功而造像陸斬犀革水斷龍角輕擊
浮截刃不纖流踰南越之巨闕超西楚之秦阿寔真精
之攸御永天祿而是荷

銘後漢馮敬通刀陽銘曰脩爾甲兵用戒不虞見危致
命臨事而懼丈不可匿武不可黷文武孔純荷天之祿
又刀陰銘曰溫溫穆穆配天之威苗裔無疆福報永綏
後漢李尤錯佩刀銘曰佩之有錯抑武揚文豈為麗好
將戒有身又金馬書刀銘曰巧冶煉剛金馬託形貢文

錯鏤兼勒工名

魏文帝露陌刀銘曰於鑠良刀胡煉亶時譬諸麟角靡所任茲不逢不若永世寶持

曹植寶刀銘曰造茲寶刀既礪既礪匪以尚武予身是衛麟角匪觸鸞距匪蹙

魏王粲刀銘曰相時陰陽制茲利兵和諸色劑考諸濁清陸剗犀兕水截鯢鯨君子服之式章威靈

魏何晏斬猛獸刀銘曰徒搏不兵作戒宣邱用造斯器

螭獸是劉制禽允良昏明曾時永燿厥後蠲民之災

晉張協文身刀銘曰寶刀既成窮理盡妙繁文波迴流光電照又把刀銘曰奕奕名金昆吾遺璞裁為把刀利亞切玉時文斯偃含精內燭威助雖化武不可黷

晉裴景聲文身刀銘曰良金百鍊乙名展巧寶刀既成窮理盡妙文繁波迴光靈照在我皇世哉不可耀

啓梁簡文帝謝勅賚善勝威勝刀啓曰冰鏐含彩雕琰表飾名均素質神號脫光五寶初成曹丕先荷其一二

勝今造愚臣揔被其恩錫韓非之書未足為比給博山之筆方此更輕

梁劉孝儀為晉安王謝東宮賜玉環刀啓曰苗峰珍鋌利極鈎芒謹當擁以雄身藉而安體不令北海小雍孤擅穿膝之寄廬江佩刀獨表不欺之驗

七首

通俗文曰七首劒屬其頭類七故曰七首短而使用

說苑曰秦王以五十里封鄢陵之君辭不受使唐且謝

秦秦王怒曰嘗見天子之怒乎一怒伏尸百萬流血千里唐且曰大王嘗聞布衣韋帶之士怒乎一怒伏尸二人流血五步即按其匕首起曰今將是矣王變色曰先生就坐寡人喻矣秦破韓滅魏鄢陵獨以五十里存者徒用先生故也

諸葛故事曰成都作匕首五百枚以給騎士

典論曰昔周魯寶雍狐之戟屈盧之矛孤父之戈徐氏匕首凡斯皆上世名器君子雖有文事必有武備矣又

曰魏太子造百辟匕首二其一理似堅冰名曰清剛其二曜似朝日名曰揚文

神仙傳曰有書生姓張就李仲文學隱術久無所得患之張懷匕首所之仲文笑曰我寧可殺

銘晉張載匕首銘曰先民造制戒豫惟詳匕首之設應速用近既不忽備亦無輕念利以彰彰功以道隱

鉞

戰國策曰馮諼為孟嘗客彈劍鉞而歌曰長鉞歸來乎

食無魚

銘晉張協長鉞銘曰五才並建金作明威長鉞陸離弭
凶防違素刃霜厲溢景橫飛又短鉞銘曰器用多品詭
制殊觀亦有短鉞清暉載爛昔在先朝戢兵靜亂惟皇
寶之優而弗玩

弓

釋名曰弓穹也張之穹隆然其末曰簫言簫邪又謂之
弭以骨為之滑弭弭也中央曰弣弣撫也所撫持也

山海經曰少皞生般是始弓矢

世本云牟夷作矢揮作弓弓矢一器作者兩人

於義有疑此言般作之是也

龍魚河圖曰弓之神名曰曲張

爾雅曰弓有緣謂之弓無緣者謂之弭以金者謂之銑以蜃者謂之珣以玉者謂之珪

方言曰弓藏謂之韃或謂之韞

說文曰角端獸狀似豕角善為弓出胡休夕國

易曰弦木為弧剡木為矢弧矢之利以威天下

廣雅曰繁弱鉅泰弓也

卷六十

周官曰司弓掌六弓四弩八矢之法辯其名物而掌其

守藏與其出入中春獻弓弩中秋獻矢箛

箛盛矢器

天子之

弓合九而成規諸侯合七而成規大夫合五而成規士

合三而成規又曰弓人為弓取六材必以其時六材既

聚巧者和之幹者以為遠也角者以為疾也筋者以為

深也膠者以為和也絲者以為固也漆者以為受霜露

也凡取幹之道七柘為上櫪次之檟桑次之橘次之木

瓜次之荆次之竹為下

毛詩曰彤弓天子賜有功諸侯也

左傳曰顏高之弓六鈞

顏高魯人也三十斤為鈞

又曰分魯公以大

路大旂夏后氏之璜封父之繁弱

郭璞毛詩拾遺曰象弭魚服毛云弭弓反末以象骨為之蓋俗說之誤也

左傳曰左執鞭弭弭者弓之別名謂以象牙為弓今西方有以犀角及器角為弓者

列子曰紀昌學射於飛衛飛衛曰爾先學不瞬而後能
又使學視小如大紀昌以羗懸虱在牖南面而望之三
年之後如輪覩物皆山邱也乃以燕角之弧朔蓬之幹
射之貫虱之心而懸不絕

楚辭曰帶長劍挾素弓

荀卿子曰天子彫弓諸侯彤弓大夫黑弓禮也

戰國策曰楚人有好以弱弓微繳加歸鴈之上者頃襄
王聞而召問之對曰見鳥六雙王何不以聖人為弓以

勇士為繳時張而射之此六雙者可得而囊載也

家語曰楚共王出遊亡其烏號之弓

烏號良弓名也

左右請求

之王曰楚人失弓楚人得之又何求焉

孔叢子曰楚王張繁弱之弓載忘歸之矢以射蛟兕於雲夢

列女傳曰晉平公使工為弓三年乃成射不穿一札公怒將殺工其妻見公曰妾之夫造此弓亦勞矣幹生泰山之阿一日三觀陰三觀陽傳以燕牛之角纏以荆麋

之筋糊以河魚之膠此四者天下之選也而不穿一札
是君不能射也妾聞射之道左手如拒石右手如附支
右手發箭左手不知公以其儀而穿七札弓工立得出
賜金三鎰

闕子曰宋景公使弓工為弓九年來見公曰為弓亦達
對曰臣不得見公矣曰臣之精盡於弓矣獻弓而歸三
日而死公張弓登臺東西而射天踰孟霜之山集彭城
之東其餘力逸勁飲羽於石梁

淮南子曰淇衛箭箛

箭箛箭竹也出於淇地衛箭羽

飾以金銀錫雖有

薄縞之慘然獨不能穿也若假之筋角之力弓弩之勢則貫兕甲而終於革楯矣

新序曰楚熊渠夜行見寢石彎弓射之沒矢飲羽下視知石也却復射之矢摧無迹

東觀漢記曰蓋延字巨卿身長八尺彎弓三百斤

張璠漢記曰陳球為零陵太守州兵朱蓋等反球守城弦大木為弓羽矛為矢機發之遠射千餘人斬朱蓋等

風俗通曰烏號弓者柘桑之枝枝條暢茂烏登其上垂下著地烏適飛去從後撥殺取以為弓因為烏號耳

箭

釋名曰矢指也其有所指向迅疾也又謂之箭箭進也其本曰足矢形似木木以下為本以根為足其末曰括括會也與弦相會也

說文曰矢弓弩矢也象鏑括羽之形

世本曰夷牟作矢

太公兵法曰箭之神名續長

易曰弦木為弧剡木為矢

周官曰庭氏掌射國中之妖鳥若不見其鳥獸則以救日之弓救月之矢夜射之

禮記曰故男子生桑弧蓬矢六以射天地四方天地四方者男子之所有事也故必先有志於其所有事

六韜曰陷堅陣敗強敵大黃參連弩飛鳬電影自副飛鳬赤莖白羽以鐵為首電影青莖赤羽以銅為首

國語曰仲尼在陳有隼集于陳侯之庭而死楷矢貫之
石弩其長尺有咫陳惠公使人以隼如仲尼之館問之
仲尼曰此肅慎之矢也昔武王克商通道于九夷八蠻
肅慎氏貢楷矢石弩以分大姬配虞胡公而封諸侯於
陳

孟子曰夫人豈不仁於函人哉夫人惟恐不傷人函人
惟恐傷人

魯連子曰齊田單破燕軍復齊城唯聊城不下燕將守

數月魯仲連乃為書著之於矢以射城中遺燕將燕將得書泣三日乃自殺

韓子曰智伯將伐趙趙襄子召張孟談曰奈無箭何孟談曰董安于之治晉陽公宮之垣皆以楮楚其楮高十尺於是登而試之其堅則幹之勁不能適也君曰奈無金何孟談曰董安于之治晉陽宮舍之堂皆以銅為柱質君登而用之有餘金矣

漢書曰李陵擊匈奴一日五十萬矢皆盡虜攻急陵歎

曰復人數十矢可以脫矣

東觀漢記曰耿弇與張步戰天中弇眼以佩刀摧之左右無知者

三齊畧記曰城東南五十里有蒲臺高八十丈秦始皇所煩處時在臺下縈蒲繫馬夾道數百步到今蒲生猶索蒲似水楊而勁堪為箭也

替梁昭明太子弓矢贊曰弓用勦角矢製良工亦以觀德非止臨戎楊葉命中援墮張空

銘後漢李尤弧矢銘曰弦木為弧剡木為矢弧矢協并
八極同紀

晉嵇令木弓銘曰烏號之朴豐條足理弦鳴走括截飛
駭止射隼高牆出有擬議既用禦武亦以招士

晉李充良弓銘曰弓矢之作爰自曩時鄉村載禮招命
在詩力稱顏高功發由基不爭之美亦以詳疑

啓齊王融謝武陵王賜弓啓曰殿下摘藻蕙樓暢藝蘭
苑敷績玉於風筵疊連珠於月兔園掩秀鄴水漸奇融

揖讓未工濫升飲之賞操弧反矢奉招賢之錫文韜鏤
景逸幹稍雲玩溢百齡佩流千載

弩

尚書帝令驗曰王弩發驚天下

釋名曰弩怒也有勢怒之鉤弦者牙以齒牙也牙外曰
郭為牙郭也含括之口曰機言機之巧也亦言如門戶
之樞機開闔有節

史記曰龐涓追孫臏臏量其暮當至馬陵道狹可伏兵

乃斫大樹白而書之曰龐涓死此樹下令萬弩夾道而
伏期日暮見火舉而俱發龐涓夜至斫木下見白書乃
鑽火燭之萬弩俱發龐涓自知智窮乃自刎曰遂成豎
子之名

史記曰項羽伏弩射中漢王傷脅乃捫足曰虜中吾指
古史考曰黃帝作弩

戰國策曰蘇秦為楚合從元戎以鐵為矢長八寸一弩
十矢俱發

吳志曰甘寧招合輕薄少年為之渠帥羣聚相隨挾持弓弩負耽帶鈴民間鈴聲即知是寧也

晉陽秋曰初高祖勒兵闕下經曹爽門爽帳下督嚴世引弩將射高祖孫謙止之曰事未可知三注三止高祖車乃過

日南傳曰南越王尉他安陽王有神人臯通安陽王治神弩一張一發大死三發殺三萬人

華陽國志曰鄧芝征涪陵見元援抱子在樹上引弩射

之中援母其子為拔箭以木葉塞創芝乃歎曰吾違物之性其將死矣投弩水中

會稽典錄曰鍾離牧謂朱育曰大皇帝以中國多騎欲得騎而當之然吳神鋒弩射三里貫洞至四馬騎敢近之乎

南越志曰龍川嘗有銅弩牙流水皆以銀黃雕鏤取之者祀而後得父老云越王弩營處也

太公兵法曰弩之神名遠望

文子曰狡兔得而獵犬死高鳥得而強弓藏

風俗通曰汲令應彬請主簿杜宣飲酒北壁上懸赤弩照於杯中其形如蛇宣畏惡之然不敢不飲因得病彬後知之思惟必懸弩所為也使致宣於故處設酒杯中猶有蛇因謂之此壁上弩影耳非有他怪宣意解病即愈

議蔡邕幽州刺史議曰幽州突騎冀州強弩天下精兵國家瞻核四方有事未嘗不取辦於二州也

銘後漢李尤弩銘曰放自近古發意所覩前聖制弓後
世建弩機牙發矢執破醜虜充獲雖屢猶不可常忘戰
者危極武者傷

彈

韓詩外傳曰楚莊王將興師伐晉敢諫者罪至死孫叔
敖進諫曰臣之國中有榆其上有蟬蟬方奮翼悲鳴欲
飲清露不知螳螂方欲食蟬而又不不知黃雀在後黃雀
方欲食螳螂不知童子挾彈丸在榆下童子欲彈黃雀

不知前有深坑後有掘株也皆貪前之利不顧後害也
楚國不征而晉國以寧孫叔敖之力也

左傳曰晉靈公從臺上彈人觀其避丸

吳越春秋曰陳音對越王云弩生於弓弓生於彈彈生
於古之孝子古者人民質朴死裹以白茅投之中野孝
子不忍父母為禽獸所食則作彈以守之故古人歌之
斷竹續竹飛土逐宍

張璠漢記曰班超使于外願將三十六人以為蒿矢彈

丸之用

東方朔記曰東方朔對驃騎難曰以珠彈不如泥丸各有所用也

太玄經曰明珠彈於飛空其復不復

世說曰前輩人忌日惟不飲酒作樂王世將以忌日送客至新亭主人欲作音樂王便起去持彈往衛洗馬墓下彈鳥

蕭子顯齊書曰桓崇祖善彈彈鳥毛盡而鳥不死海鵠

羣翔崇祖登城樓彈之無不折翅

詩晉桓玄南林彈詩曰散帶躡良駟揮彈出長林歸翮
赴舊棲喬木轉翔禽落羽尋絕響屢中轉應心

賦晉夏侯孝若繳彈賦曰張弱弓理繁繳望大羣以送
丸審追放而必獲

銘後漢李尤彈銘曰昔之造彈起意弦木以丸為矢合
竹為樸漆飾以霑不用筋角丸彈之利以弋見驚晉靈
驕倖羣臣是彈樂其如躍趨如避丸

稍

通俗文曰矛丈八者謂之稍

後魏書曰于栗磾築壘於河上親自守焉裕甚憚之遺
栗磾書假道西上題書曰黑稍公麾下栗磾以聞太宗
太宗因授黑稍將軍

靈鬼志曰河間王顥既敗於關中有給使陳安者常乘
一赤馬俊快非常雙持二刀皆長七尺馳馬運刀所向
披靡關西為之歌曰壘上健兒字陳安頭細面狹腸中

寬丈八大槩左右盤

詩晉傅玄詩曰彎我繁弱弓弄我丈八稍一舉覆三軍
再舉殄戎貊

書晉庾翼與燕王書曰今致朱漆鈎三十張絳珀書幡
黑眊副也

序梁簡文帝馬槩譜序曰馬槩為用雖非遠法近代相
傳稍已成藝鄧鹿榮魏后之廷武而猶質種馬入丹陽
之寺雄而未巧聊以餘暇後撰斯法搜採抑揚斟酌煩

簡至春亭落景秋臯晚靜嚴霜盡降
露雲初晴纖驪沃
若天馬半漢盼金精而轉態交流
汗血爰連乾而息影
不畏衣香雕衢與白刃同暉
翠眊與紅塵俱動足使武
夫憤氣觀者衝冠巴童留玩不待輕舟之楫
越女踟躕
無假如臯之箭



藝文類聚卷六十

欽定四庫全書

子部

藝文類聚卷六十二

詳校官中書_臣李彤

員外郎_臣牛稔文履勘

總校官知縣_臣楊懋珩

校對官編修_臣沈清藻

謄錄監生_臣范廷驊

欽定四庫全書

藝文類聚卷六十一

唐 歐陽詢 撰

居處部一 總載居處

易曰上古穴居而野處後世聖人易之以宮室上棟下
宇以待風雨

楚辭曰像設君室靜閑安高堂邃宇檻層軒層臺累榭
臨高山網戶朱綴刻方連冬有突夏夏室寒經堂入奧
朱塵延 承塵筵席也 砥室翠翹挂曲瓊弱阿拂壁羅幃張翡

帷翠幃飾高堂紅壁沙版玄玉梁仰觀刻桷畫龍蛇坐
堂伏檻臨曲池芙蓉始發雜芰荷紫莖屏風文緣波又
曰築室兮水中葺之兮以荷蓋荃壁兮紫壇播芳椒兮
成堂桂棟兮蘭橈辛夷楣兮葯房

鹽鐵論曰貴人之家梓匠斲巨為小以圓為方上成雲
氣下成山林

漢武故事曰上起神屋鑄銅為柱黃金塗之赤玉為階
椽亦以金刻玳瑁為禽獸以薄其上椽首皆作龍首銜

鈴流蘇懸之鑄銅為竹以赤白石脂為泥椒汁和之以
火齊薄其上扇屏悉以白琉璃作之光照洞徹以白珠
為簾箔玳瑁壓之以象牙為牀以琉璃珠玉明月夜光
雜錯天下珍寶為甲帳其次為乙帳甲以居神乙上自
御之前庭植玉樹珊瑚為枝以碧玉為葉或青或赤悉
以珠玉為之子皆空其中如小鈴鎗鎗有聲費標作鳳
皇軒翥若飛狀

漢書曰趙皇后姊為昭儀居昭陽舍其中庭彤采而砌

皆銅沓黃金塗白玉階壁帶往往為黃金釭函藍田壁
明珠翠羽飾之又曰五侯大治第宅起土山漸臺洞門
高廓閣道百姓歌之曰五侯初起曲陽最怒壞決高都
決高都使水入長連竟外杜杜陵也成都侯商嘗病欲避
安城高都在城西

暑從上借明光宮又穿長安城引內漕水以行船立羽
蓋張周帷楫櫂越歌上幸商第見赤墀青瑣又曰梁孝
王築東苑方三百里廣睢陽城七十里大治宮室為複
道自宮連屬於平臺三十餘里

東觀漢記曰琅琊孝王京就國都雅好宮室窮極技巧
壁帶玉飾以金銀

張璠漢記曰山陽督郵張儉奏中常侍侯覽起第十六
區皆高樓四周連閣洞門之井蓮華壁杜綵畫魚池臺
苑擬諸宮闕

董生書曰禮天子之宮在清廟左涼室右明堂後路寢
四室者足以避寒暑而不高大也夫高近陽廣室多陰
故室適形而止

仲長統昌言曰今為宮室者崇臺數十層長街十百仞
延袤臨浮雲上樹九丈旗珠玉翡翠以為飾連帷為城
構帳為宮起臺榭則高數百丈壁帶珠玉土披緹錦
曹植表曰詔使周觀初玩雲盤北觀疏圃遂步九華神
明特處譎詭天然誠可謂帝室皇居者矣雖崑崙閼風
之麗文昌之居不是過也

羅含別傳曰桓宣武以舍為別駕以官廨寺諠擾非靜
默所處乃於城西池小洲上立茅茨之屋竹果蔭宇伐

木為牀織葦為席布衣蔬食晏若之餘

詩陳孔奭名都一何綺詩曰京洛信名都佳麗擬蓬壺
九華彫玳瑁百福上椒塗黃金絡腰褭蓮花裝鹿盧咸
言儀服盛無勝執金吾

陳沈炯詩曰名都一何綺春日吐光輝高樓雲母扇複
殿琉璃扉昭儀同輦出高安連騎歸欲知天子貴千門
應紫微

陳周弘正詩曰名都宮觀綺金壁藻華璫吹臺望鳩鵲

舞殿接披香繡轂遊丹水彫輦出平陽陸離徒照眼何
解憂人腸

賦漢楊雄蜀都賦曰蜀都之地古曰梁州禹治其江渟
臯彌望鬱乎青葱丹青玲瓏石鱗水螭於近則有瑕英
菌芝玉石江珠於遠則有銀鉛錫碧馬犀象焚西有鹽
泉鐵冶橘林銅陵其傍則有期牛兕旄金馬碧雞其竹
則宗生族攢俊茂豐美夾江緣山尋卒而起其深則有
獼獼沉鰾水豹蛟蛇其都門二九四百餘閭兩江珥其

市九橋帶其流苴竹浮流龜磧若蜎風胎雨鼓衆物駭
目百華投春隆隱芳芬螭燭若揮錦布繡望芒芒兮無
幅其布則簫中黃潤一端數金雕鏤鉤罷百技千工上
乃使有伊之徒調夫五味甘甜之和芍藥之羹江東鮑
鮑隴西牛羊五肉七菜臠厭腥臊若其吉日嘉會期於
送春之陰迎夏之陽置酒于榮川之間宅設坐于華都
之高堂延帷揚幕接帳連岡郗公之徒相與如平陽類
巨沼羅車百乘期會投宿觀者方隄行船競逐也

後漢班固西都賦曰賦者古詩之流或以抒下情而通
諷諭或以宣上德而盡忠孝雍容揄揚亦推頌之亞也
西土耆老有陋洛邑之議故臣作兩都之賦漢之西都
在乎雍州左據函谷二嶠之阻表以太華終南之山右
界褒斜隴首之險帶以洪河涇渭之川披三條之廣路
立十二之通門英俊之域絞冕所興冠帶如雲七相五
公其陽則崇山隱天幽林穹谷陸海珍藏藍田美玉其
陰則冠以九嶷陪以甘泉下有鄭白之沃衣食之源提

封五萬疆場綺紛溝塍剡鏤原隰龍鱗決渠降雨荷鋪
成雲離宮別館神池靈沼其中則有九真之鱗大宛之
馬黃支之犀條枝之鳥其宮室也體象乎天地經緯乎
陰陽樹中天之華闕豐冠山之朱堂因壤材而究奇抗
應龍之虹梁列芬櫨以布翼荷棟桴而高驤彫玉璫以
居楹裁金壁以飾璫左城倉勒反右平重軒三階閨房
周通門闥洞開列鍾虞於中庭立金人於端闈增盤崔
嵬登降炤爛殊形詭制每各異觀乘茵步輦唯所息宴

後宮則有掖庭椒房后妃之室茝若椒風披香發越蘭
林蕙草鴛鴦飛翔之列昭陽特盛隆乎孝成隋侯明月
錯落其間金缸銜壁是為列錢翡翠火齊流曜含英珊
瑚碧樹周阿而生後宮之號十有四位窈窕繁華更盛
迭貴又有天祿石渠典籍之府講論乎六藝稽合乎異
同周以鈎陳之位衛以嚴更之署周廬千列徼道綺錯
輦路經營修途飛閣峻塏道而超西墉混建章而連外
屬神明臺名也鬱其特起遂偃蹇而上躋軼雲雨於太半

虹蜺迴帶於芬楮攀井幹而未半目眩轉而意迷靈草
冬華神木叢生抗仙掌以承露擢雙立之金莖爾乃盛
娛遊之壯觀曜威靈而講武事命荊州使起烏詔梁野
而驅獸毛羣內填飛羽上覆列卒周匝星羅雲布矢不
單殺中必壘雙風毛雨血灑野蔽天於是天子乃登屬
玉之館歷長楊上林也之榭陳輕騎以行魚騰酒車以斟
酌割鮮野饗舉烽命爵大輅鳴鑾容與徘徊集乎豫章
之宇臨乎昆明之池左牽牛而右織女似雲漢之無涯

茂樹蔭蔚芳草被堤若擣錦與布繡燭燿乎其波玄鶴
白鷺見鷺鴻鴈沉浮往來雲集霧散都都相望邑邑相
屬國籍十世之基家承百年之業又東都賦曰王莽作
逆漢祚中缺於是聖皇握乾符闡坤珍披皇圖稽帝文
赫然發憤應若興雲遂超大河跨北嶽立號高邑建都
河洛系唐統接漢緒茂育羣生恢復疆宇若乃順時節
而蒐狩簡車徒以講武歷駟虞覽駟騏嘉車攻采吉日
禮官整儀乘輿乃出於是發鯨魚鏗華鍾登玉輅乘時

龍元戎竟野戈鋌雲羽旄掃蜺旌旗拂天然後舉烽
伐鼓申令三驅輜車霆擊驍騎電驚指顧倏忽獲車已
實樂不極盤殺不盡物於是薦三犧效五牲禮神祇懷
百靈覲明堂臨辟雍登靈臺考休徵列百僚而贊羣后
穹皇儀而展帝容明堂詩曰於昭明堂明堂孔陽聖皇
宗祀穆穆煌煌辟雍詩曰乃流辟雍辟雍湯湯聖皇莅
止造舟為梁靈臺詩曰三光宣精五行布序習習祥風
祁祁甘雨寶鼎詩曰岳修貢兮川效珍吐金景兮歌浮

雲寶鼎見兮色紛紜煥其炳兮被龍文白雉詩曰啓靈
篇兮披瑞圖獲白雉兮效素烏嘉祥阜兮集皇都發皓
羽兮奮翹英

後漢張衡西京賦曰昔班固觀世祖遷都于洛邑懼將
必踰溢制度不能遵先聖之正法也故假西都賓盛稱
長安舊制有陋洛邑之議而為東都主人折禮衷以荅

之張平子薄而陋之故更造焉有馮虛公子者

無此公
子但依

憑言

言於安處先生曰

亦無此
先生也

秦據雍而強周即豫而

弱高祖都西而秦光武處東而約先生獨不見西京之

事歟漢氏初都在渭之涘秦里其朔實為咸陽

里居朔北也高

帝六年改曰長安

左有崤函重險桃林之塞綴以二華巨靈鼎

顛高掌遠蹠以流河曲厥迹猶存右有隴坻之隘隔閼

華戎岐梁汧雍陳寶鳴雞在焉於前則終南太一隆窟

崔嵬隱鱗鬱律連岡乎嶠冢爰有藍田珍玉是之自出

於後則高陵平原據渭踞涇其遠則九蔓甘泉涸陰沍

寒日北至而含凍此焉清暑寔為地之奧區神臯昔者

太帝悅秦穆公而覲之饗以鈞天廣樂帝有醉焉乃為
金策錫用此土而剪諸鶉首自我高祖之始入也乃覽
秦制跨周法正紫宮於未央表堯闕於閭闔疏龍首以
抗殿狀鬼我以及業蒂倒茄於藻井披紅葩之狎獵飾
華棖與璧璫流景曜之暉煜彫楹玉碣繡栢雲楣三階
重軒鏤檻文槐左平右城青瑣丹墀仰福帝居陽曜陰
藏洪鐘萬鈞猛虞趙趙負筍業而餘怒乃奮超而騰驤
若夫長年神仙宣室玉堂麒麟朱鳥龍興含章正殿路

寢用朝羣辟嘉木樹庭芳草如積高門有閤列坐金秋

秦時長狄見於臨洮鑄銅作其象

後宮則昭陽飛翔增成合歡蘭林披

香鳳皇鴛鸞

皆宮殿名

故其館室次舍采飾纖縠裛以藻繡

文以朱綠翡翠火齊絡以美玉流懸黎之夜光綴隋珠
以為燭於是鉤陳之外閣道穹隆屬長樂與明光徑北
通乎桂宮恣意所幸下輦成燕窮年忘歸猶不能徧覩
往昔之遺館獲林光於秦餘處甘泉之爽塏乃隆崇而
弘敷既新作於迎風增露寒與儲胥通天眇以竦峙徑

百常而莖摧翔鵬仰而弗逮况青鳥與黃雀伏櫺檻而
俯聽聞雷霆之相激柏梁既災越巫陳方建章是經用
厭火祥園闕竦以造天若雙碣之相望鳳騫翥於慶標
咸遡風而欲翔十雲霧而上達狀亭亭以迢迢神明崛
其特起井幹壘而百增上飛闥而仰眺正覩瑤光與玉
繩列瀛洲與方丈夾蓬萊而駢羅長風激於別島起洪
濤而揚波海若遊於玄渚鯨魚失流而蹉跎立脩莖之
仙掌承雲表之清露屑瓊藥以朝食必性命之可度爾

乃廓開九市通闌帶闌旗亭五重俯察百隧

隧列肆上道也

林禁苑跨谷彌阜東至鼎湖邪界細柳掩長楊而連五
柞繞黃山而款牛首乃有昆明靈沼黑水玄汜周以金
堤樹以柳杞豫章珍館揭焉中峙牽牛立其左織女處
其右日月於是乎出入象扶桑與濛汜其魚則鮪鯢鱗
魴脩額短項大口折鼻詭類殊種鳥則鸛鷕鵠鴒駕鶩
鴻鷖南翔衡陽北棲鴈門於是孟冬作陰寒風肅殺雨
雪飄颻冰霜慘烈天子乃駕雕軫六駿駁戴翠帽倚金

較華蓋承辰天畢先驅千乘雷動萬騎龍趨縱獵徒赴
長莽迅卒清候武士赫怒河渭為之波盪吳岳為之阤
堵百禽悽速騷瞿奔觸喪精亡魂失歸忘趣矢不虛捨
鋌不苟躍當足見踉蹌值輪被轢乃使迅羽輕足尋景追
括鳥不暇舉獸不得發青骹摯於韝下韓盧噬於縶末
於是鳥獸殫目觀窮遷延邪睨集乎長楊之宮酒車酌
醴方駕授饗升觴舉燧既醕鳴鍾饗侔乎五柞之館旋
憩乎昆明之池浮鷁首翳雲芝垂翟葆建羽旗齊拽女

縱棹歌奏淮南度陽阿大駕幸乎平樂帳甲乙而襲翠
被臨迴望之廣場程角觝之妙戲烏獲扛鼎都盧尋橦
衝狹鷲濯胃突銛鋒跳丸劍之揮霍走索上而相逢度
曲未終雲起雪飛巨獸百尋是為蔓延神山崔嵬歛從
背見白象行孕垂鼻麟困海鱗變而成龍狀蜿蜒以蝮
蝮於云反舍利獸名魍魎化為仙車驪駕四鹿芝蓋九葩
奇幻儵忽易貌分形吞刀吐火雲霧杳冥畫地成川流
渭通涇百馬同轡騁足並馳撞末之技能不可彌秘舞

更奏妙材騁技始徐進而羸形似不勝乎羅綺紛縱體
而迅赴若驚鶴之羣罷要紹修態麗服颺菁昭邈流眄
一顧傾城列爵十四競媚取榮盛衰無常唯愛所丁衛
后興於真髮飛燕寵於輕體入東京賦曰是時也七雄
竝爭競相高以奢麗楚築章華於前趙建叢臺於後秦
政利甯長距終得擅場思專其侈以莫已若也乃構阿
房起甘泉結雲閣觀南山百姓不能忍是用息肩於大
漢高祖膺錄受圖順天行誅掃項軍於垓下紿子嬰於

枳塗因秦宮室據其府庫且夫天子有道狩在海外守
位以仁不恃隘害秦負阻於二關卒開項而受沛彼偏
據而規小豈若宅中而圖大昔先王之經邑也掩觀九
隩靡地不營土圭測影不縮不盈揔風雨之所交然後
以建王城審曲面勢汭洛背河左伊右瀍西阻九阿盟
津達其後太谷通其前迴行道乎伊闕斜徑捷乎轅轅
太室作鎮揭以熊耳底柱輟流鏺以太坏漢初弗之宅
也故宗緒中圯巨猾間豐竊弄神器歷載三六偷安天

位我世祖念之乃龍飛白水鳳翔參墟授鉞四七共工
是除區宇又寧思和求中睿哲玄覽都茲洛宮逮至顯
宗六合殷昌既新崇德遂作德陽昭仁惠於崇賢抗義
聲於金商建象魏之兩觀旌六典之舊章濯龍芳林九
谷八谿芙蓉覆水秋蘭被涯永安離宮脩竹冬青陰池
幽流玄泉冽清鶚鵠秋棲鵲鵲春鳴鳩鸛黃鸝關關嚶
嚶於南則前殿雲臺和懽安福諺門曲榭斜阻城湫奇
樹珍果鉤盾所職於東則洪池清蘊淶水澹澹內阜川

禽外豐葭茨其西則平樂都場示遠之觀龍雀蟠蜿天

馬半漢乃營三宮布政頒常複廟重屋于斯胥洎龍輅

充庭雲旗拂霓夏正三朝庭燎晰晰

章列反

春日載陽合

射辟雍設業設虞宮懸金鏞鼓

音汾

鼓路鼓

音桃

樹羽幢幢

張大侯制五正設三之匪

音非弱

司旌天子乃撫玉輅時乘

六龍發鯨魚鏗華鍾攝提運衡徐至於射宮禮事展樂

物具王夏闋騶虞奏決拾既次彫弓斯鼓

古候反

達餘萌

於暮春昭誠心以遠喻三農之隙耀威中原歲惟仲冬

大閱西園乃馭小戎撫輕軒戈矛若林牙旗繽紛迄乎
上林結徒為營叙和樹表司鐸授鉦坐作進退節以軍
聲火烈具舉武士星敷鵠鶴魚麗箕張翼舒馭不詭遇
射不翦毛升獻六禽時膳四膏成禮三驅解罟放麟不
窮樂以訓儉不殫物以昭仁爾乃卒歲大讌驅除羣癘
俵子萬童丹首玄製桃弧棘矢所發無臬飛礮雨散剛
痺必斃煌火馳而星流逐赤疫於四裔又南都賦曰於
顯樂都既麗且康陪京之南居漢之陽剖周楚之豐壤

跨荆豫而為疆其寶利珍怪則金米玉璞隋珠夜光太
一餘糧中黃穀玉松子神陂赤靈解角耕父揚光於清
泠之泉游女弄珠於漢臯之曲其水蟲則有蜺龜鳴蛇
潛龍伏螭其鳥則有鴛鴦鵲鷺鴻鵠鴛鴦鵲鷺和鳴澹
澹隨波其香草則薜荔蕙若蘼蕪蓀長晻曖蓊蔚含芬
吐芳酒則九醞甘醴十旬無清醪敷徑寸浮蟻若萍其
甘不與醉而不醒獻酢既交率禮無違彈琴操簫流風
徘徊於是暮春之楔元巳之辰方軌齊軫被音弗于陽濱

朱帷連網曜野映雲脩袖繞繚而滿庭羅襪躡蹠而容
與翩綿綿其若絕眩將墜而復舉於是羣士放逐馳于
沙場俯貫魴鱖仰落雙鶴魚不及竄鳥不暇翔車雷震
而風厲馬鹿超而龍驤夕暮而歸其樂難忘

後漢杜篤論都賦曰天命有聖託之大漢大漢開基高
祖有勳斬白蛇屯黑雲蹈滄海跨崑崙劉敬建策初都
長安太宗承流守之以文孝武因其餘財府帑之畜深
入匈奴割裂王庭連綏耳鎖雕題推天督牽象犀沃野

千里原隰彌望保值五穀桑麻條暢濱據南山帶以涇
渭號曰陸海蠢生萬類城池百尺阨塞要害一人奮戟
三軍沮敗于時聖帝赫然申威南禽公孫北脅強胡西
平隴冀東據洛都今天下新定夫石之勤始瘳未遑於
論都而遺思雍州也

後漢崔駰反都賦曰漢厯中絕京師為墟光武受命始
遷洛都客有陳西土之富云洛邑褊小故略陳禍敗之
機不在險也建武龍興奮旅西驅虜赤眉計高胡斬銅

馬破骨都收翡翠之駕據天下之圖上帝受命將昭其
烈潛龍初九真人乃發上貫紫宮徘徊天闕惺狼孤蹈
參伐陶以乾坤始分日月觀三代之餘烈察殷夏之遺
風背峻岳之固即周洛之中興四郊建三雍禪梁父封
岱宗

漢傅毅洛都賦曰惟漢元之運會世祖受命而弭亂體
神武之聖姿握天人之契贊尋往代之規兆乃險塞之
自然被崑崙之洪流據伊洛之雙川挾成臯之巖阻扶

二嶠之崇山分畫經緯開正奎軌序立廟祧面朝後市
歎息起零霧奮袂生風雨覽正殿之體制承日月之皓
精騁流星於突陋追歸鴈於軒輶帶螭龍之疏鏤垂菡
萏之敷榮顧濯龍之臺觀望永安之園藪渟清沼以汎
舟浮翠虬與玄武桑宮繭館區制有規后帥九嬪躬敕
工女近則明堂辟雍靈臺之列宗祀揚化雲物是察其
後則有長岡芒阜屬以首山通谷岷岵石瀨寒泉於是
乘輿鳴和按節發軔列翠蓋方龍輶備五路之時副撫

三辰之旗旂傳說作僕義和奉時千乘雷駭萬騎星鋪
絡繹相屬揮沫揚鏹羣仙列於中庭發魚龍之巨偉羨
門拊鼓倭佗操麾講武農隙校獵因田搜幽林以集禽
激通川以御獸跨乘黃射遊麋弦不虛控目不徒睎解
腋分心應箭殪夷然後弭節容與淶水之濱垂芳餌於
清流出漩瀨之潛鱗

魏徐幹齊都賦曰齊國實坤德之膏腴而神州之奧府
其川瀆則洪河洋洋發源崑崙驚波沛厲浮沫揚奔南

望無垠北顧無鄂蕪葭蒼蒼莞蕸沃若瑰禽異鳥羣萃
乎其間帶華蹈縹披紫垂丹應節往來翕習翩翩靈芝
生乎丹石發翠華之煌煌其實玩則玄蛤抱璣駁蚌含
璫構夏殿以宏覆起層榭以高驤龍楹螭桷山岳雲牆
其後宮內庭嬪妾之館衆偉所施極巧窮變然後脩龍
橋遊洪池折珊瑚破琉璃日既反而西舍乃反宮而棲
遲歡幸在側便嬖侍隅含清歌以詠志流玄眸而微眄
竦長袖以合節紛紛翩翩其輕迅王乃乘華玉之輅駕元

駁之駿武騎星散鉦鼓雷動旌旗虹亂盈乎靈圃之中
於是羽族咸興毛羣盡起上蔽穹庭下被畢藪

魏劉楨魯都賦曰昔大庭氏肇建厥居少昊受命亦都
茲焉山則連岡屬嶺噴沓峽北紫金揚暉於洪崖水精
潛光乎雲穴岱宗邈其層秀千氣霧以高越其木則赤
楸青松文莖蕙棠洪幹百圍高徑穹皇竹則填彼山垠
陔彌阪域夏簫攢包勁條竝殖翠實離離鳳皇攸食水
產衆夥各有彛倫頌首華尾豐顙重斷戴兵挾刀盤甲

曲麟且觀其時謝節移和族綏宗招歡合好肅戒友朋
蛾眉清眸顏若雪霜插曜日之珍筭珥明月之珠璫舞
人就列整飾容華和顏揚眸眄風長歌飄乎焱發身如
轉波尋虛騁迹顧與節和縱脩袖以終曲若奔星之赴
河及其素秋二七天漢指隅民胥袞袞國于水游緹惟
彌津丹帳覆洲蓋如飛鶴馬如游魚應門巖巖朱扉含
光路歿歸其隆崇丈陸獻其高驤聽迅雷於長除若有
聞而復亡其園圃苑沼駢田接連淥池分浪以帶石垠

文隅瓊岬華玉依津邦乃大狩振揚武威教民卽戎講
習興師落幕囊括連結營圍毛羣隕殪羽族殲剝填崎
塞畎不可勝錄

魏劉邵趙都賦曰且敞邑者固靈州之敞宇而天下之
雄國南則有洪川巨瀆黃水濁河發河積石徑拂太華
灑為九流入于元波東則有天浪水府百川是鍾包絡
坤維連薄大濛北則有陶林元壇增水洹寒西則有靈
邱平圃邪接崑崙其近則有天井句注飛壺太行堆錯

礪硤屬阜連岡龍首差我以岌鬱羊坂輪峒以岷塘清
漳發源濁淦汨越湯泉涓沸洪波漂厲爾乃都城萬雉
百里周迴九衢交錯三門旁開層樓竦閣連棟結階峙
華爵以表慶若翔鳳之將飛正殿儼其造天朱櫺赫以
舒光盤虬螭之蜿蜒承雄虹之飛梁結雲閣於南宇立
叢臺於少陽及至暮秋涉秋則風烈寒猛豺鷲攫鷹隼
奮翰國乃講武狩于清源駕鷲冥之駿駁抗冲天之旌
旃北連昭餘南屬呼沱西眇太陵東結繚河然後嵯子

放機戈矛亂發決斑鬚破文頰當手斃僵應弦倒越爾
乃進夫山中名倡義國妖女狄鞮妙音卽鄆才舞六八
駢羅遞奏迭舉體凌浮雲聲哀激楚其珍玩服物則昆
山美玉元珠曲環輕綃啓繒織繡緋紉其器用良馬則
六弓四弩綠沈黃間堂嶧魚腸丁令角端飛兔奚斯常
驪紫燕豐鬣確顱龍身鵠頸目如黃金蘭筋參精迅躡
飛浮軼響追聲若乃至季春元巳辰火熾光挺新贈往
被于水陽朱幕蔽野綵帷連岡妖冶呈飾顏如春英

晉左思蜀都賦曰夫蜀都者蓋兆基於上世開國于中古廓靈闕而為門包玉壘而為宇帶二江之雙流抗蛾眉之重阻於前則跨躡犍犍枕倚交趾經塗所亘五千餘里於是乎邛竹緣嶺菌桂臨崖翳挺龍目側生荔枝布綠葉之萋萋結朱實之離離孔翠羣翔犀象競馳白雉朝雛猩猩夜啼金馬騁光而絕影碧雞倏忽而曜曦火井沉熒於幽泉高燭飛扇於天垂於後則却背華容北指崑崙緣以劒閣阻以石門流漢湯湯驚浪雷奔望

之天迴即之雲昏水物殊品鱗介異族或藏蛟螭或隱
碧玉其樹則有木蘭侵音桂杞櫛椅桐梗桺幽藹於谷
底松柏蒼蔚於山峰擢脩幹竦長條扇飛雲拂輕霄
和假道於峻岐陽烏迴翼乎高標於東則左綿巴中百
濮所充外負銅梁於宕渠內函要害於膏腴丹砂赭熾
出其坂蜜房郁毓被其阜山圖米而得道赤斧服而不
朽交讓所值蹲鴟所伏百藥灌叢寒卉冬馥其中則有
青珠黃環碧砮芒硝或豐綠萸或蕃丹椒紅葩紫飾柯

葉漸苞敷葉歲蕤落英飄飄溝洫脉散疆里綺錯黍稷
油油稷稻漠漠指渠口以為雲門灑灔池而為陸澤爾
乃邑居隱賑夾江倚山家有鹽泉之井戶有橘柚之園
百果甲坼異色同榮朱櫻春熟素奈夏成若乃大火流
涼風厲白露凝微霜結紫梨津潤棗罇發蒲萄亂漬
石榴競裂晨晷旦至候鴈銜蘆木落南翔冰泮北徂雲
飛水宿哢吭胡浪反清渠其深則有鱣鮪鰭鱗鯉魴
差鱗次色錦質報章闢二九之通門畫方軌之廣塗營

新宮於爽塏擬承明而起廬結陽城之延閣飛觀榭乎
雲中開高軒以臨山列綺窓以瞰江內則宣化之闥崇
禮之闡華闕雙邈重門洞開金鋪交映玉題相暉亞以
少城接乎其西列隧百重羅肆巨千賄貨山積纖麗星
繁都人士女袿服靚才性反粧布有僮華麵有枕榔叩竹
傳節於大夏之邑蒟醬流味於番禺之鄉闌閭之里伎
巧之家百室離房機杼相和貝錦斐成濯色江波若夫
王孫之屬却公之倫從禽於外巷無居人並乘騏驎俱

服魚文西踰金隄東越玉津戟食鐵之獸射噬毒之鹿

拍軀泯於蔓草彈言鳥於森木拔象齒戾

歷結反

犀角鳥

鍛翮獸廢足殆而竭來相與第如滇

丁田反

池集乎江洲

試水客漾輕舟娉江妃與神遊將饗獠者張帝幕會平

原酌醪酤割芳鮮飲御酣賓旅旋車馬雷駭轟轟填填

近則江漢炳靈世載其英蔚若相如瞬若君平王褒煒

燦而秀發楊雄含章而挺生幽思絢道德摘藻揆天庭

又吳都賦曰東吳王孫羈

勅忍反大笑也

然而咍曰夫上圖景

宿辯於天文者也下料物土析於地理者也鳥策策素
玉牒石記烏聞梁岷有陟方之館行宮之基歟而吾子
獨未聞大吳之壯麗乎且有吳之開國也造自秦伯宣
於延陵固其經略上當星紀拓土畫疆指衡岳以鎮野
目龍川而帶垓百川派別歸海而會控清引濁混濤并
瀨瀆薄沸騰寂寥長邁出乎太荒之中行乎東極之外
於是乎長鯨吞航修鯢吐浪躍龍騰蛇蛟鰐琵琶汭洄
順流噏噏沉浮鳥則鷗鷗鷓鴣鷓鴣鷓鴣鷓鴣避風候

鴈造江湛淡羽儀隨波參差理翮整翰容與自玩彫啄
蔓藻刷盪漪瀾蚌蛤珠胎與月虧全巨鰲鼉顛首冠靈
山大鵬續翻翼若垂天洪桃盤屈丹桂灌叢瓊枝抗莖
而敷藥珊瑚幽茂而玲瓏增岡重阻列真之宇江妃於
是往來海童於是宴語草則藿納豆寇薑彙非一石帆
水松東風扶留布獲臯澤蟬聯陵邱蚶緣山岳之巴窳
歷江海之流木則平仲君遷松梓古度楠榴之木相思
之樹宗生高岡族茂幽阜摧本千尋垂蔭萬畝與風颯

颺颺瀏瀏颺颺鳴條暢律飛音響亮蓋象琴筑并奏笙竽
俱唱其竹則簫簫林箴桂箭射筒袖梧有篁篁篳有叢
苞筍抽節往往縈結綠葉翠莖冒霜停雪梢雲無以喻
嶰谷不能連鸞鶯食其實鵲雛擾其間其果則丹橘餘
甘荔枝之林檎榔無柯椰葉無陰其琛賂則琨瑤之阜
銅錯也白鐵之垠火齊之寶駛雞之珍頰丹明璣金華銀
樸紫貝流黃縹碧素玉其荒陬譎詭則有龍穴內蒸雲
雨所儲陵鯉若獸浮石若桴雙則比目片則王餘窮陸

飲木極沉水居泉室潛織而卷綃淵客慷慨而泣珠象
耕鳥耘此之自改賁海為鹽采山鑄錢國稅再熟之稻
鄉貢八蠶之縣造姑蘇之高臺臨四遠而特建帶朝夕
之濬池佩長洲之茂苑闕東山之府則瓊寶溢目觀海
陵之倉則紅粟流行雕欒鏤案音節青瑣丹楹圖以雲氣
畫以仙靈高闈有閼洞門方軌朱闕雙立馳道如砥樹
以青槐亘以淥水桃笙象簟韜於筒中蕉葛升越弱於
羅紵命官帥而擁鐸將校獵乎具區吳王乃巾玉輅輶

驕驕羽旄揚蕤雄戟耀鉞貝冑象珥織文鳥章六軍約
服四騏龍驤猩猩啼而就禽鸞鸞扶弗反笑而被格屠已

蛇出象骼斬鵬翼掩廣澤結輕舟而競逐迎潮水而振
緡精衛銜石而遇繳文鯨夜飛而觸綸指包山以為期
集洞庭而淹留數軍實乎桂林之苑饗戎旅乎落星之
樓又魏都賦曰魏國先生有睟其容乃盱衡而詰曰并
乎交益之士劔閣雖嶠嶠險也憑之者蹶洞庭雖濬負之者
北且魏土者畢昴之所應虞夏之餘人先王之桑梓列

聖之遺塵爾其疆域則旁及齊秦結湊冀道開胃殷衛
跨躡燕趙墨井鹽池玄滋素液厥田惟中厥壤惟白思
重爰摹大壯覽荀卿采蕭相枌橈複結欒櫨疊施丹梁
虹申以並亘朱桷森布而支離綺井列疏以懸蒂華蓮
重葩而倒披於前宣明顯陽順德崇禮重闡洞出鏘鏘
濟濟於後椒鶴文石永巷壺街楸梓木蘭次舍甲乙增
構我我清塵剽剽雲雀跼蹐而矯首壯翼搞鏤於青霄
雷雨杳冥而未半暎日籠光於綺寮碩果灌叢圍木竦

尋篁條懷風蒲荀結陰丹藕凌波而的皪綠芰汎濤而
浸潭羽翮頡頏鱗介浮沉澄流十二同原異口蓄為屯
雲泄為行雨內則街衢輻輳朱闕結隅石杠杠橋也飛梁
出控漳渠疏通溝以濱路羅青槐以蔭途

晉庾闡揚都賦曰子未聞揚都之巨偉也左滄海右岷
山龜鳥津其落江漢演其源碣金標乎象浦注桐柏乎
元川昔句吳端委延州儼臧高讓殆於庶幾英風亞乎
潁陽土映黃旗之景巒吐紫蓋之祥巖栖赤松之館岫

啓縉雲之堂龍符渙而夏德興羣神萃而玉帛昌也天
包龍軫地奄衡霍玄聖所遊陟方所託我皇晉之中興
而駿命是廓靈運啓於中宗天網振其絕絡於是乎源
澤浩養林阜隱薈彭蠡吞江荆牙吐瀨赴三峽之隘洞
九川之會泮五嶺而分流鼓沱潛而碎沛漭潏潏滿潢
漾擁涌驚波霆激駭浪川動東注尾閭呼踰洞庭茫若
雲漢窈若青城其山則重岡峨岿峻嶺嵒崿陽侯鱗萃
龍濤綺錯峭崿磊砢鬼峯都薄茹帶千溪下同萬壑木

則灌以杞梓被以沙棠結根九疑布葉天桂林為五嶽
之苑材為八都之府掃飛虹虧陽景拂白雪而增翠凌
廣莫而敷穎竹則聆風筍輅條蕩林筵單棘瑩莎翳尉
蕭疎貞條梢風勁節集霧望之猗猗即之倩倩蒼浪之
竿東南之箭其林可游其芳可薦草則陵苔海藻山英
江薤綸組菁茅繁露卷施獸則騶駼後猊鋸牙披蹄登
重巘蹲嶭嶢嶢噫氣則風生噴沫則雨灑其間則有騰援
大嶠閃儵柯杪風母果然星流電遷或凌虛赴絕或繚

繞希聞鳥則鷦鷯孔翠丹穴之羽鳴鳳自歌翔鸞自舞
魚則鮫鱣鰭鮪比目鰭魴脩鯤橫海傲鯨偃波其中則
有靈蛟白鼃之族種繁六眸類豐三足鸚螺蛻骨寄居
負教餘泉如輪文蚺如珠果則黃甘朱橙楊桃琵琶林
蔚八桂之業色耀三珠之華爾其實怪則有瑤琨琅玕
青碧素珉陽珠散火陰甲潛珍雲英水玉錯耀龍鱗煥
若金膏晃若燭銀琉璃冰朗而外映珊瑚觸石而構翹
牙簞裂文於象齒火布濯穢於炎焱西岨石城則舟車

之所混并東盡金塘則方駕之所連箱其中則有龍坻
華屋晨晃之舸青雀飛臚餘皇鼓拖鷁首鋪於黃宮盤
蛟纏於赤馬爰有蘭堂華室高門重構羅鼎玉食絲竹
竝奏龍驥汗血於廣塗朱輪擊轂而輻湊

晉傅元正都賦曰撫琴瑟陳鍾虞吹鳴簫擊靈鼓奏新
聲理秘舞乃有材童妙妓都盧迅足緣脩竿而上下形
既變而景屬忽跟挂而倒絕若將墜而復續虬縈龍蛇
委隨紆曲杪竿首而腹旋承巖節之繁促於是神嶽雙

立岡巖岑崒靈草蔽崖嘉木成林東父翳青盖而遐望
西毋使三足之靈禽丹蛟吹笙文豹鼓琴素女撫瑟而
安歌聲可意而入心偃佺仝而鶴立和清響音而哀吟

藝文類聚卷六十一